

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, de 26. Februar 2021

Här President,

sou wéi d'Chambersreglement et virgesäit, bieden ech Iech, dës dréngend parlamentaresch Fro (Art. 84 vum Chambersreglement) un d'Madamm Gesondheitsminister weiderzeleeden.

Am Kader vun der Impfkampagn géint Covid-19 krut de Konviktskaart – Résidence Grande-Duchesse Joséphine-Charlotte vum Ministär d'Zouso, datt d'Bewunner an d'Personal vun där Institutioun am Fleegeheim selwer géife geimpft ginn. Nodeems d'Leedung vum Konviktskaart schonns déi néideg Virbereedunge getraff hat, krut si vum Ministär déi onerwaart Noriicht, datt de Konviktskaart net méi op der Lëscht vun deenen Haiser géif stoen, wou d'Bewunner an d'Personal automatesch géife geimpft ginn. Dat heescht am Kloertext, datt d'Bewunner vum Konviktskaart, deen als „Logement encadré“ agestuift gëtt, esou behandelt gi wéi Leit, déi bei sech doheim wunnen.

An deem Kontext hunn ech folgend Froen un d'Madamm Gesondheitsminister:

1. Wéi ass et méiglech, datt eng Zouso vum Gesondheitsministär, bei där et ëm d'Liewe vu besonnesch vulnerable Mënsche geet, sou kuerzfristeg zrëckgeholl gouf?
2. Firwat musse sech eeler Mënschen, déi zum Deel net iwwer technesch Fäegkeete verfügen, iwwer een Zougankscodes um Site vum Gesondheitsministär umellen, fir een Impfredezvous ze kréien? Kéint een dës Leit, déi zum Deel kee Mënsch hunn, deen hinne bei dëser Prozedur Hëllef kéint, net dës technesch Problemer erspueren?
3. Ginn et Iwwerleeungen, fir an Zukunft Leit, déi keng Famill hunn, déi mat hinnen an den Impfzenter fiert, sur place an hirem Logement encadré impfen ze loossen?

Mat déiwem Respekt,



Jeff Engelen